

Representanten **Mark Taylor (MDG)** stilte følgjande spørsmål til hovudutvalet:

«Eg viser til Framlegg: Avslag på søknad til HNV 2021 utlysning 15. April der søknadene

«Akselerator for sirkulær bioøkonomi» frå Bioregion Institute og «Utvikling av prosjekt Geopark Sunnhordland» frå Samarbeidsrådet for Sunnhordland IKS er innstilt med avslag med grunngjevinga «nokre manglar».

Kan fylkesdirektøren informere konkret om manglane i desse to søknadene, t.d. ved å gjere tilgjengeleg dei korte skriftlege vurderingane av kvar søknad i samsvar med karakter m.m. og kvifor desse søknadene er innstilt med avslag?»

Settefylkesdirektør innovasjon og næringsutvikling gav følgjande svar:

Administrasjonen har forståing for at det er ynskjeleg med detaljert grunngjeving for tilråding i spørsmål om prosjektstøtte. Administrasjonen har nytta panelvurdering som metode. Metoden bygger på at minst fire personar med pannelleiar vurderer kvar enkelt søknad ut frå i kor stor grad den treff utlysinga. Metoden vert nytta av Noregs forskingsråd og er evaluert av forvaltningsrevisjonen. Målet er alltid å få gjennomført mest mogleg av vedtatt politikk i handlingsplanen med minst mogleg ressursbruk, og med vekt på likebehandling, nøytralitet og habilitet.

I dette arbeidet nytter fagpanela både talkarakterar og skriftleg samandrag som verktøy for å oppnå sams tilråding. Søknadsevaluering vil imidlertid aldri være heilt ut kvantifiserbar. Det betyr at fagpanela si grunngjeving i stor grad kan diskuteras. Det vil være ulike syn på grunngjevingane avhengig av om ein til dømes er søkjer innstilt på avslag, fagekspert eller generelt i samfunnet.

Utvikling av prosjekt Geopark Sunnhordland (prosjektkostnad kr 1 020 000)

Panelet vurderer at dette er eit viktig og godt prosjekt for å oppnå verdsarvstatus og som reiselivsprosjekt. Det vert vurdert at prosjektet i stor grad er indirekte for å oppnå hovudmåla i denne utlysinga (sirkulærøkonomi, grøn konkurransekraft og energi). Prosjektfinansieringa skal først og fremst gå til å skrive ferdig UNESCO søknad som skal leverast i oktober i år. Vidare til å finansiere leing av prosjektet og utarbeiding av fagtekstar frå geolog/arkeolog. Deler av prosjektet er i fleire tidlegare fasar finansiert av fylkeskommunen i tillegg til at fylkeskommunen bidrar med tid frå administrasjonen (geolog) inn i prosjektet. Fagpanelet og administrasjonen har derfor vurdert søknaden som «4 - Godt - Søknaden svarer godt på kriteriet, men den har fleire manglar.»

Akselerator for sirkulær bioøkonomi (prosjektkostnad kr 7 520 000)

Søknaden treff i høg grad tema for utlysinga ved fokus på alle dei mest relevante miljøtema. Den breie og omfattande tilnærminga bidreg samtidig til at prosjektet verker mindre målretta og skårar svakt på gjennomføringsevne. Prosjektplanen er noke uklår, og det kan framstå som om pengestøtta det vert søkt om går til finansiering av organisasjonen sitt arbeidsfelt generelt, og i mindre grad til konkrete prosjekt. Døme kan være «Utvikle driftsmodell, planlegge løysing for lokalar med tilhøyrande budsjett. Leigeavtale er inngått med utleigar. Definere behov og inngå leigeavtaler med partnarar. Inngå industrielle partneravtaler. Definere tverrsektoriell Bioregional designmodul saman med akademia. Behovsavklaring for forskningsprosjekt i biomaterialutvikling. Endelig kostnad og finansieringsbudsjett.» Vidare «Fokusområder og prosessar vi aktiverer i første fase er: Materialdesign / Marin mikrobiologi / Tekstiler / Byggmaterialer/ Grønn produksjon / Urban dyrking.» med fleire. Panelet og administrasjonen har derfor vurdert søknaden som «2 - Svakt - Søknaden svarer ikkje godt på kriteriet. Den har overvekt av vesentlege manglar.»

Same søker er tilrådd tilsegn på søknad «Etablering av forum for landbruksplast». Denne søknaden framstår meir konkret, spissa og gjennomførbar.